



文選正文

山子點

五

~ 16  
2788  
6



16  
2788  
6

文選正文卷之五

詩類

補亡詩六首

四言并序

束皙

南陔孝子相戒以養也

循彼南陔言採其蘭眷戀庭闈心不遑安彼居之子罔或游  
盤馨爾夕膳潔爾晨餐循彼南陔厥草油油彼居之子色思  
其柔眷戀庭闈心不遑留馨爾夕膳潔爾晨羞有獺有獺在  
河之涘凌波赴汨噬魴捕鯉噉噉林鳥受哺于子養隆敬薄  
惟禽之似勗增爾虔以介丕祉

白華孝子之潔白也

白華朱萼被於幽薄粲粲門子如磨如錯終晨三省匪惰其

東晉  
永和五年  
三月之故  
十日書  
長史自右  
明  
書

恪白華絳趺在陵之陬。蓍蓍士子涅而不渝。竭誠盡敬。塵壘忘劬。白華玄足。在丘之曲。堂堂處子。無營無欲。鮮伴晨葩。莫之點辱。

華黍時和。歲豐宜黍稷也。

黼黻重雲。習習和風。黍華陵巔。麥秀丘中。靡田不播。九穀斯豐。奕奕玄霄。濛濛甘露。黍發稠華。禾挺其秀。靡田不殖。九穀斯茂。無高不播。無下不植。芒芒其稼。參參其穡。穡我王委。充我民食。玉燭陽明。顯猷翼翼。

由庚萬物得由其道也。

蕩蕩夷庚。物則由之。蠢蠢庶類。王亦柔之。道之既由。化之既柔。木以秋零。草以春抽。獸在于草。魚躍順流。四時遞謝。八風

代扇。織阿。案暑。星變其躔。五緯不愆。六氣無易。愔愔我王。紹文之跡。

崇丘萬物得極其高大也。

瞻彼崇丘。其林藹藹。植物斯高。動類斯大。周風既洽。王猷允泰。漫漫方輿。迺迺洪覆。何類不繁。何生不茂。物極其性。人永其壽。恢恢大圓。茫茫九壤。資生仰化。于何不養。人無道夭。物極則長。

由儀萬物之生各得其儀也。

肅肅君子。由儀率性。明明后辟。仁以為政。魚遊清沼。鳥萃平林。濯鱗鼓翼。振振其音。賓寫爾誠。主竭其心。時之和矣。何思何修。文化內輯。武功外悠。

述祖德詩二首 五言

謝靈運

達人貴自我，高情屬天雲。兼抱濟物性，而不纓垢氛。敗生藩  
 魏國，展季救魯人。弦高犒晉師，仲連却秦軍。臨組乍不緤，對  
 珪寧肯分。惠物辭所賞，勵志故絕人。若若歷千載，遙遙播清  
 塵。清塵竟誰嗣，明哲時經綸。委講綴道論，改服康世屯。屯難  
 既云康，尊主隆斯民。晉師當是秦師。蓋似作者誤。

中原昔喪亂，喪亂豈解已。崩騰永嘉末，逼迫太元始。河外無  
 反正，江介有蹶圯。萬邦咸振懼，橫流賴君子。拯溺由道情，龕  
 暴資神理。秦趙欣來蘇，燕魏遲文軌。賢相謝世運，遠圖因事  
 止。高揖七州外，拂衣五湖裏。隨山疏濬潭，傍巖藝枌梓。遺情  
 捨塵物，貞觀丘壑美。

諷諫詩 并序四言

韋孟

孟爲元王傅，子夷王及孫王。戊戌荒淫不遵道，作詩諷諫。  
 肅肅我祖國，自豕韋黼衣。朱黻四牡龍旂，彤弓斯征。撫寧遐  
 荒，總齊羣邦。以翼大商，迭彼大彭。勲績惟光，至于有周。歷世  
 會同，王赧聽譖。寤寤絕我邦，我邦既絕。厥政斯逸，賞罰之行。非  
 由王室，庶尹羣后。靡扶靡衛，五服崩離。宗周以墜，我祖斯微。  
 遷于彭城，在予小子。勤咲厥生，阨此媿秦。耒耜斯耕，悠悠媿  
 秦。上天不寧，乃眷南顧。授漢于京，於赫有漢。四方是征，靡適  
 不懷。萬國攸平，乃命厥弟。建侯于楚，俾我小臣。惟傅是輔，矜  
 矜元王。恭儉靜一，惠此黎民。納彼輔弼，享國漸世。垂烈於後，  
 乃及夷王。尅奉厥次，咨命不永。惟王統祀，左右陪臣。斯惟皇

文選正文卷之五  
士如何我王不思守保不惟履冰以繼祖考邦事是廢逸游  
是娛犬馬悠悠是放是驅務此鳥獸忽此稼苗蒸民以匱我  
王以媮所弘匪德所親匪俊唯囿是恢唯諛是信踰踰諂夫  
謬謬黃髮如何我王曾不是察既藐下臣追欲縱逸嫚彼顯  
祖輕此削黜嗟嗟我王漢之睦親曾不夙夜以休令聞穆穆  
天子照臨下土明明羣司執憲靡顧正遐由近始其茲怙嗟  
嗟我王曷不斯思匪思匪監嗣其罔則彌彌其逸岌岌其國  
致冰匪霜致墜匪慢瞻惟我王時靡不練興國救顛孰違悔  
過追思黃髮秦繆以霸歲月其徂年其逮耆於赫君子庶顯  
于後我王如何曾不斯覽黃髮不近胡不時鑒

勵志詩

張華

大儀幹運天廻地游四氣鱗次寒暑環周星火既夕忽焉素  
秋涼風振落熠燿宵流其一吉士思秋寔感物化日歟月歟  
在再代謝逝者如斯曾無日夜嗟爾庶士胡寧自念其二仁  
道不遐德輪如羽求焉斯至衆鮮克舉大猷玄漠將抽厥緒  
先民有作貽我高矩其三雖有淑姿放心縱逸出般于游居  
多暇日如彼梓材弗勤丹漆雖勞朴斲終負素質其四養由  
矯矢獸號于林蒲盧縈繳神感飛禽末伎之妙動物感心研  
精眇道安有幽深其五安心恬蕩棲志浮雲體之以質彪之  
以文如彼南畝力耒旣勤蔗蓂致功必有豐殷其六水積成  
川載瀾載清土積成山歆蒸鬱冥山不讓塵川不辭盈勉志  
含弘以隆德聲其七高以下基洪由纖起川廣自源成人在

始累微以著乃物之理。纒牽之長實累千里。其八復禮終朝。天下歸仁。若金受礪。若泥在鈞。進德修業。暉光日新。隰朋仰慕予亦何人。其九

上責躬應詔詩表

曹植

臣植言。臣自抱釁歸藩。刻肌刻骨。追思罪戾。晝分而食。夜分而寢。誠以天網不可重罹。聖恩難可再恃。竊感相鼠之篇。無禮遄死之義。形影相弔。五情愧赧。以罪棄生。則違古賢夕改之勸。忍垢苟全。則犯詩人胡顏之譏。伏惟陛下德象天地。恩隆父母。施暢春風。澤如時雨。是以不別荆棘者。慶雲之惠也。七子均養者。鳴鳩之仁也。舍罪責功者。明君之舉也。矜愚愛能者。慈父之恩也。是以愚臣徘徊於恩澤。而不敢自棄者也。前奉詔書。臣等絕朝心。離志絕。自分黃耆。永無執珪之望。不圖聖詔。猥垂齒召。至止之日。馳心輦轡。僻處西館。未奉闕庭。踊躍之懷。瞻望反側。不勝犬馬戀主之情。謹拜表并獻詩一篇。詞旨淺末。不足采覽。貴露下情。冒顏以聞。臣植誠惶誠恐。頓首頓首。死罪死罪。

責躬詩四言

於穆顯考。時惟武皇。受命于天。寧濟四方。朱旗所拂。九土披攘。玄化滂流。荒服來王。超商越周。與唐比蹤。篤生我皇。奕世載聰。武則肅烈。文則時雍。受禪于漢。君臨萬邦。萬邦既化。率由舊則。廣命懿親。以藩王國。帝曰爾侯。君茲青土。奄有海濱。方周于魯。車服有輝。旗章有叙。濟濟俊乂。我弼我輔。伊余小

子恃寵驕盈舉掛時綱動亂國經作藩作屏先軌是隳傲我  
皇使犯我朝儀國有典刑我削我黜將寘于理元凶是率明  
明天子時惟篤類不忍我刑暴之朝肆違彼執憲哀予小子  
改封充邑于河之濱股肱弗置有君無臣荒淫之闕誰弼余  
身煢煢僕夫于彼冀方嗟予小子乃罹斯殃赫赫天子恩不  
遺物冠我玄冕要我朱紱光光大使我榮我華剖符授玉王  
爵是加仰齒金璽俯執聖策皇恩過隆祗承怵惕咨我小子  
頑凶是嬰逝慚陵墓存愧闕庭匪敢傲德寔恩是恃威靈改  
加足以沒齒昊天罔極生命不圖常懼顛沛抱罪黃墟願蒙  
矢石建旗東嶽庶立毫釐微功自贖危軀授命知足免戾甘  
赴江湘奮戈吳越天啓其衷得會京畿運奉聖顏如渴如饑  
心之云慕愴矣其悲天高聽卑皇肯照微

應詔詩

肅承明詔應會皇都星陳夙駕秣馬脂車命彼掌徒蕭我征  
旅朝發鸞臺夕宿蘭渚芒芒原隰祁祁士女經彼公田樂我  
稷黍爰有樛木重陰匪息雖有糒糧饑不遑食望城不過面  
邑不游僕夫警策平路是由玄駟藹藹揚鑣漂沫流風翼衡  
輕雲承蓋涉澗之濱緣山之隈遵彼河汭黃坂是階西濟關  
谷或降或升駢駮倦路載寢載興將朝聖皇匪敢晏寧苒節  
長驚指日遘征前驅舉燧後乘抗旌輪不輟運鑿無廢聲爰  
暨帝室稅此西墉嘉詔未賜朝覲莫從仰瞻城闕俯惟闕庭  
長懷永慕憂心如醒

於皇時晉受命既固三祖在天聖皇紹祚德博化光刑簡枉  
 錯微火不戒延我寶庫其蠢爾戎狄狡焉思肆虞我國青  
 窺我利器岳牧慮殊威懷理二將無專策兵不素肄其二翹  
 翹趙王請徒二萬朝議惟疑未逞斯願桓桓梁征高牙乃建  
 旗蓋相望偏師作援其三虎視眈眈威彼好時素甲日耀玄  
 幕雲起誰其繼之夏侯士惟系惟處別營某時其四夫豈  
 無謀戎士承平守有完郭戰無全兵鋒交卒奔孰免孟明飛  
 檄秦郊告敗上京其五周狗師令身膏氏斧人之亡貞節  
 克舉盧播違命投畀明土為法受惡誰謂荼苦其六哀此黎  
 元無罪無辜肝腦塗地白骨交衢夫行妻寡父出子孤俾我

晉民化為狄俘其七亂離斯瘼日月其稔天子是矜肝食晏  
 寢主憂臣勞孰不祗慄愧無獻納尸素以甚其八皇赫斯怒  
 爰整精銳命彼上谷指日遄逝親奉成規稜威遐厲首陷中  
 亭揚聲萬計其九兵因詭道先聲後實聞之有司以萬為一  
 紂之不善我未之必虛鼎滿德繆彰甲吉其十雍門不啓陳  
 汧危偪觀遂虎奮感恩輸力重圍克解危城載色豈日無過  
 功亦不測其十一情固萬端于何不有紛紜濟萬亦孔之醜  
 日納其降曰梟其首疇真可掩孰偽可久其十二既徵爾辭  
 既蔽爾訟當乃明實否則證空好爵既靡顯戮亦從不見竇  
 林伏尸漢邦其十三周人之詩寔曰采薇北難獫狁西患昆  
 夷以古况今何足矍威徒愍斯民我心傷悲其十四斯民如



何荼毒于秦師。旅旣加飢饉。是因疫癘淫行。荆棘成榛。絳陽之粟。浮于渭濱。其十五。明明天子。視民如傷。申命羣司。保爾封疆。靡暴于衆。無陵于強。惴惴寡弱。如熙春陽。其十六。

公讌詩 五言

曹植

公子敬愛客。終宴不知疲。清夜遊西園。飛蓋相追隨。明月澄清景。列宿正參差。秋蘭被長坂。朱華冒綠池。潛魚躍清波。好鳥鳴高枝。神飈接丹轂。輕輦隨風移。飄飄放志意。千秋長若斯。

公讌詩

王粲

昊天降豐澤。百卉挺歲穰。涼風撤蒸暑。清雲却炎暉。高會君子堂。並坐蔭華榭。嘉肴充圓方。旨酒盈金甌。管絃發徵音。曲度清且悲。合坐同所樂。但慙杯行遲。常聞詩人語。不醉且無歸。今日不極歡。含情欲待誰。見眷良不翅。守分豈能違。古人有遺言。君子福所綏。願我賢主人。與天享巍巍。克符周公業。奕世不可追。

公讌詩

劉楨

永日行游戲。歡樂猶未央。遺思在玄夜。相與復翱翔。輦車飛素蓋。從者盈路傍。月出照園中。珍木鬱蒼蒼。清川過石渠。流波爲魚防。芙蓉散其華。菡萏溢金塘。靈鳥宿水裔。仁獸游飛梁。華館寄流波。豁達來風涼。生平未始聞。歌之安能詳。投翰長歎息。綺麗不可忘。

侍五官中郎將建章臺集詩

應瑒

朝鴈鳴雲中音響一何哀問子遊何鄉戢翼正徘徊言我塞  
門來將就衡陽棲往春翔北土今冬客南淮遠行蒙霜雪毛  
羽日摧頽常恐傷肌骨身隕沈黃泥簡珠墮沙石何能中自  
諧欲因雲雨會濯翼陵高梯良遇不可值伸眉路何階公子  
敬愛客樂飲不知疲和顏既以暢乃肯顧細微贈詩見存慰  
小子非所宜爲且極歡情不醉其無歸凡百敬爾位以副飢  
渴懷

皇太子宴玄圃宣猷堂有令賦詩四言陸機

三正迭紹洪聖啓運自昔哲王先天而順羣辟崇替降及近  
古黃暉旣渝素靈承祐乃眷斯顧祚之宅止二后始基世武  
丕承協風傍駭天啓仰澄淳耀六合皇慶攸興自彼河汾奄

齊七政時文惟晉世篤其聖欽翼昊天對揚成命九區克咸  
譙歌以詠皇上纂隆經教弘道于化旣豐在工載考俯釐庶  
績仰荒大造儀刑祖宗妥綏天保篤生我后克明克秀體輝  
重光承規景數茂德淵冲天姿玉裕叢爾小臣邈彼荒遐弛  
厥負擔振纓承華匪願伊始惟命之嘉

大將軍宴會被命作詩

陸雲

皇皇帝祐誕隆駿命四祖正家天祿安定獻哲惟晉世有明  
聖如彼日月萬景攸正其一巍巍明聖道隆自天則明分爽  
觀象洞玄陵風協紀絕輝照淵肅雍往播福祿來臻其二在  
昔姦臣稱亂紫微神風潛駭有赫茲威靈旗樹旆如電斯揮  
致天之屆于河之沂有命再集皇輿凱歸其三頽綱旣振品

物咸秩神道見素遺華反質辰晷重光協風應律函夏無塵  
海外有謚其四芒芒宇宙天地交泰王在華堂式宴嘉會玄  
暉峻朗翠雲崇靄昆弁振纓服藻垂帶其五祁祁臣僚有來  
雍雍薄言載考承顏下風俯覲嘉客仰瞻玉容施已唯約于  
禮斯豐天錫難老如岳之崇其六

晉武帝華林園集詩

應禎

悠悠太上民之厥初皇極肇建彝倫攸敷五德更運膺籙受  
符陶唐既謝天歷在虞其一於時上帝乃顧惟眷光我先祚  
應期納禪位以龍飛文以虎變玄澤滂流仁風潛扇區內宅  
心方隅回面其二天垂其象地曜其文鳳鳴朝陽龍翔景雲  
嘉禾重穎冀莢載芬率上咸序人胥悅欣其三恢恢皇度穆

穆聖容言思其順貌思其恭在視斯明在聽斯聰登庸以德  
明試以功其四其恭惟何昧且不顯無理不經無義不踐行  
捨其華言去其辯游心至虛同規易簡六府孔修九有斯靖  
其五澤靡不被化罔不加聲教南暨西漸流沙幽人肆嶮遠  
國忘遐越裳重譯充我皇家其六峩峩列辟赫赫虎臣內和  
五品外威四賓修時貢職入覲天人備言錫命羽蓋朱輪其  
七貽宴好會不常厥數神心所受不言而喻於是肄射弓矢  
斯御發彼五的有酒斯飫其八文武之道厥猷未墜在昔先  
王射御茲器示武懼荒過亦爲失凡厥羣后無懈于位其九  
九日從宋公戲馬臺集送孔令詩五言謝瞻  
風至授寒服霜降休百工繁林收陽彩密苑解華叢巢幕無

留鷺遵渚有來鴻。輕霞冠秋日。迅商薄清穹。聖心眷嘉節。揚鑾戾行宮。四筵霑芳醴。中堂起絲桐。扶光迫西汜。歡餘宴有窮。逝矣將歸客。養素克有終。臨流怨莫從。歡心歎飛蓬。

樂游應詔詩

范曄

崇盛歸朝闕。虛寂在川岑。山梁協孔性。黃屋非堯心。軒駕時未肅。文囿降照臨。流雲起行蓋。晨風引鑿音。原薄信平蔚。臺澗備曾深。蘭池清夏氣。修帳含秋陰。遵渚攀蒙密。隨山土嶠嶽。睇目有極覽。游情無近尋。聞道雖已積。年力互頽侵。探已謝丹黻。感事懷長林。

九日從宋公戲馬臺集送孔令詩

謝靈運

季秋邊朔苦。旅鴈違霜雪。淒淒陽卉腓。皎皎寒潭潔。良辰感聖心。雲旗興暮節。鳴葭戾朱宮。蘭卮獻時哲。餞宴光有孚。和樂隆所缺。在宥天下理。吹萬羣方悅。歸客遂海隅。脫冠謝朝列。弭棹薄枉渚。指景待樂闕。河流有急瀾。浮駮無緩轍。豈伊川途念。宿心愧將別。彼美丘園道。喟焉傷薄劣。

應詔燕曲水作詩

顏延之

道隱未形。治彰既亂。帝迹懸衡。皇流共貫。惟王創物。永錫洪算。仁固開周。義高登漢。其一。祚融世哲。業光列聖。太上正位。天臨海鏡。制以化裁。樹之形性。惠浸萌生。信及翔泳。其二。崇虛非徵。積實莫尚。伊人和實。靈所贖。日完其朔。月不掩望。航琛越水。輦賚踰嶂。其三。帝體麗明。儀辰作貳。君彼東朝。金昭玉粹。德有潤身。禮不愆器。柔中淵映。芳猷蘭秘。其四。昔在

文昭今惟武穆烏赫王宰方且居叔有醉獻藩爰履奠牧寧  
極和鈞屏京維服其五 朏魄雙交月氣參變開榮灑澤舒虹  
爍電化際無間皇情爰眷伊思鎬飲每惟洛宴其六 郊餞有  
壇君舉有禮幙帷蘭甸畫流高陞分庭薦樂析波浮醴豫同  
夏諺事兼出濟其七 仰閱豐施降惟微物二妨儲謀五塵朝  
黻途泰命屯恩充報屈有悔可悛滯瑕難拂其八

皇太子釋奠會作詩

顏延之

國尚師位家崇儒門稟道毓德講藝立言浚明爽曙達義茲  
昏永瞻先覺顧惟後昆其一 大人長物繼天接聖時屯必亨  
運蒙則正偃閉武術闡揚文令庶士傾風萬流仰鏡其二 虞  
庠飾館睿圖炳粹懷仁憬集抱智麇至踵門陳書躡屣獻器

澡身玄淵宅心道秘其三 伊昔周儲聿光往記思皇世哲體  
元作嗣資此夙知降從經志遏彼前文矩周規值其四 正殿  
虛筵司分簡日尚席函杖丞疑奉帙侍言稱辭停史秉筆妙  
識幾音王載有述其五 肆議芳訊大教克明敬躬祀典告奠  
聖靈禮屬觀盥樂薦歌笙昭事是肅俎實非馨其六 獻終襲  
吉卽宮廣讌堂設象筵庭宿金懸台保兼徽皇戚比彥肴乾  
酒澄端服整弁其七 六官視命九賓相儀纓笏市序巾卷充  
街都莊雲動野旭風馳倫周伍漢超哉逸猗其八 清暉在天  
容光必照物性其情理宜其奧妄先國胄側聞邦教徒愧微  
冥終謝智效其九

侍宴樂游苑送張徐州應詔詩 五言

丘遲

詰且聞闔開馳道聞鳳吹輕萸承玉輦細草藉龍騎風遲山  
尚響雨息雲猶積巢空初鳥飛若亂新魚戲寔惟北門重匪  
親孰爲寄參差別念舉肅穆恩波被小臣信多幸投生豈酬  
義

應詔樂游苑餞呂僧珍詩

沈約

丹浦非樂戰負重切君臨我皇秉至德忘已用堯心愍茲區  
宇內魚鳥失飛沈推轂一嶠道揚旆九河陰超乘盡屬選  
士皆百金戎車出細柳餞席樽上林命師誅後服授律緩前  
禽函轅方解帶堯武稍披襟伐罪芒山曲吊民伊水濤將陪  
告成禮待此未抽簪

送應氏詩二首

曹植

步登北芒阪遙望洛陽山洛陽何寂寞宮室盡燒焚垣墉皆  
頓擗荆棘上參天不見舊耆老但覩新少年側足無行徑荒  
疇不復田遊子久不歸不識陌與阡中野何蕭條千里無人  
煙念我平生居氣結不能言其一清時難屢得嘉會不可常  
天地無終極人命若朝霜願得展嬾婉我友之朔方親昵並  
集送置酒此河陽中饋豈獨薄賓飲不盡觴愛至望苦深豈  
不愧中腸山川阻且遠別促會日長願爲比翼鳥施翮起高  
翔其二

征西官屬送於陟陽侯作詩

孫楚

晨風飄岐路零雨被秋草傾城遠追送餞我千里道二命皆  
有極咄嗟安可保莫大於殤子彭聃猶爲夭吉凶如糾纏憂

喜相紛擾。天地爲我鑪。萬物一何小。達人垂大觀。誠此苦不早。乖離卽長衢。惆悵盈懷抱。孰能察其心。鑒之以蒼昊。齊契在今朝。守之與偕老。

金谷集作詩

潘岳

王生和鼎實。石子鎮海沂。親友各言邁。中心悵有違。何以叙離思。携手游郊畿。朝發晉京陽。夕次金谷湄。迴谿縈曲阻。峻阪路威夷。綠池泛淡淡。青柳何依依。濫泉龍鱗瀾。激波連珠揮。前庭樹沙棠。後園植烏桯。靈囿繁石榴。茂林列芳梨。飲至臨華沼。遷坐登隆坻。玄醴染朱顏。但想杯行遲。揚桴撫靈鼓。簫管清且悲。春榮誰不慕。歲寒良獨希。投分寄石友。白首同所歸。

王撫軍庚西陽集別作

謝瞻

祇召旋北京。守官反南服。方舟析舊知。對筵曠明牧。舉觴矜飲餞。指途念出宿。來晨無定端。別晷有成速。頽陽照通津。夕陰曖平陸。榜人理行艫。輪軒命歸僕。分手東城闔。發櫂西江澳。離會雖相雜。逝川豈往復。誰謂情可書。盡言非尺牘。

鄰里相送方山詩

謝靈運

祇役出皇邑。相期憩甌越。解纜及流潮。懷舊不能發。析析就衰林。皎皎明秋月。含情易爲盈。遇物難可歇。積痾謝生慮。寡欲罕所闕。資此永幽棲。豈伊年歲別。各勉日新志。音塵慰寂寞。

新亭渚別范零陵詩

謝朓

洞庭張樂地。瀟湘帝子游。雲去蒼梧野。水還江漢流。停驂我  
悵望。輟棹子夷猶。廣平聽方籍。茂陵將見求。心事俱已矣。江  
上徒離憂。

別范安成詩

沈約

生平少年日。分手易前期。及爾同衰暮。非復別離時。勿言一  
樽酒。明日難重持。夢中不識路。何以慰相思。

詠史詩

王粲

自古無殉死。達人所共知。秦穆殺三良。惜哉空爾爲。結髮事  
明君。受恩良不訾。臨沒要之死。焉得不相隨。妻子當門泣。兄  
弟夾路垂。臨穴呼蒼天。涕下如縷縈。人生各有志。終不爲此  
移。同知埋身劇。心亦有所施。生爲百夫雄。死爲壯士規。黃鳥  
作悲詩。至今聲不虧。

三良詩

曹植

功名不可爲。忠義我所安。秦穆先下世。三臣皆自殘。生時等  
榮樂。既沒同憂患。誰言捐軀易。殺身誠獨難。攬涕登君墓。臨  
穴仰天歎。長夜何冥冥。一往不復還。黃鳥爲悲鳴。哀哉傷肺  
肝。

詠史詩八首

左思

羽冠弄柔翰。卓犖觀羣書。著論准過秦。作賦擬子虛。邊城苦  
鳴鏑。羽檄飛京都。雖非甲冑士。疇昔覽穰苴。長嘯激清風。志  
若無東吳。鈇刀貴一割。夢想騁良圖。左眄澄江湘。右盼定羌  
胡。功成不受爵。長揖歸田廬。鬱鬱澗底松。離離山上苗。以彼



徑寸莖蔭此百尺條。世胄躡高位，英俊沈下僚。地勢使之然，  
由來非一朝。金張藉舊業，七葉珥漢貂。馮公豈不偉，白首不  
見招。吾希段干木，偃息藩魏君。吾慕魯仲連，談笑却秦軍。當  
世貴不羈，遭難能解紛。功成恥受賞，高節卓不羣。臨組不肯  
綵，對珪寧肯分。連璽曜前庭，比之猶浮雲。濟濟京城內，赫赫  
王侯居。冠蓋蔭四術，朱輪竟長衢。朝集金張館，暮宿許史廬。  
南鄰擊鐘磬，北里吹笙竽。寂寂揚子宅，門無卿相輿。寥寥空  
宇內，所講在玄虛。言論準宣尼，辭賦擬相如。悠悠百世後，英  
名擅八區。皓天舒白日，靈景耀神州。列宅紫官裏，飛宇若雲  
浮。峩峩高門內，藹藹皆王侯。自非攀龍客，何爲歛來游。被褐  
出閭闔，高步追許由。振衣千仞岡，濯足萬里流。荆軻飲燕市，  
酒酣氣益震。哀歌和漸離，謂若傍無人。雖無壯士節，與世亦  
殊倫。高盼邈四海，豪右何足陳。貴者雖自貴，視之若埃塵。賤  
者雖自賤，重之若千鈞。主父宦不達，骨肉還相薄。買臣困樵  
采，伉儷不安宅。陳平無產業，歸來鬻負郭。長卿還成都，壁立  
何寥廓。四賢豈不偉，遺烈光篇籍。當其未遇時，憂在填溝壑。  
英雄有迍邐，由來自古昔。何世無奇才，遺之在草澤。習習籠  
中鳥，舉翮觸四隅。落落窮巷士，抱影守空廬。出門無通路，枳  
棘塞中途。計策棄不收，塊若枯池魚。外望無寸祿，內顧無斗  
儲。親戚還相蔑，朋友日夜疎。蘇秦北游說，李斯西上書。俛仰  
生榮華，咄嗟復彫枯。飲河期滿腹，貴足不願餘。巢林棲一枝，  
可爲達士模。

詠史詩

張協

昔在東京時。朝野多歡娛。藹藹東都門。羣公祖二疎。朱軒耀  
金城。供帳臨長衢。達人知止足。遺榮忽如無。抽簪解朝衣。散  
髮歸海隅。行人爲隕涕。賢哉此丈夫。揮金樂當年。歲暮不留  
儲。顧謂四座賓。多財爲累愚。清風激萬代。名與天壤俱。咄此  
蟬冕客。君紳宜見書。

覽古詩

盧諶

趙氏有和璧。天下無不傳。秦人來求市。厥價徒空言。與之將  
見賈。不與恐致患。簡才備行李。圖令國命全。藺生在下位。繆  
子稱其賢。奉辭馳出境。伏軾徑入關。秦王御殿坐。趙使擁節  
前。揮袂睨金柱。身玉要俱捐。連城旣僞往。荆玉亦真還。爰在  
澠池會。二主剋交歡。昭襄欲負力。相如折其端。皆血下霑襟。  
怒髮上衝冠。西缶終雙擊。東瑟不隻彈。捨生豈不易。處死誠  
獨難。稜威章臺顛。彊禦亦不干。屈節邯鄲中。俛首忍廻軒。廉  
公何爲者。負荆謝厥讐。智勇冠當世。弛張使我歎。

張子房詩

謝瞻

王風哀以思。周道蕩無章。卜洛易隆替。典亂罔不亡。力政吞  
九鼎。苛慝暴三殤。息肩纏民思。靈鑒集朱光。伊人感代工。聿  
來扶興王。婉婉幙中畫。輝輝天業昌。鴻門銷薄蝕。垓下隕欃  
槍。爵仇建蕭宰。定都護儲皇。肇允契幽叟。翻飛指帝鄉。慧心  
奮千祀。清埃播無疆。神武睦三正。裁成被八荒。明兩燭河陰。  
慶霄薄汾陽。鑿於歷頽寢。飾像薦嘉嘗。聖心豈徒甄。惟德在

無忘逝者如可作。揆子慕周行。濟濟屬車士。粲粲翰墨場。瞽夫違盛觀。竦踊企一方。四達雖平直。寒步愧無良。餐和忘微遠。延首詠太康。

秋胡詩

顏延之

倚梧傾高鳳。寒谷待鳴律。影響豈不懷。自遠每相匹。婉彼幽閑女。作嬪君子室。峻節貫秋霜。明豔侔朝日。嘉運旣我從。欣願自此畢。其一燕居未及好。良人顧有違。脫巾千里外。結綬登王畿。戒徒在昧且。左右來相依。驅車出郊郭。行路正威遲。存爲久離別。沒爲長不歸。其二嗟余怨行役。三陟窮晨暮。嚴駕越風寒。解鞍犯霜露。原隰多悲涼。迴飈卷高樹。離獸起荒蹊。驚鳥縱橫去。悲哉游宦子。勞此山川路。其三超遙行人遠。

宛轉年運徂。良時爲此別。日月方尚除。孰知寒暑積。僊俛見榮枯。歲暮臨空房。涼風起坐隅。寢興日已寒。白露生庭蕪。其四勤役從歸願。反路遵山河。昔辭秋未素。今也歲載華。蠶月觀時暇。桑野多經過。佳人從所務。窈窕援高柯。傾城誰不顧。弭節停中阿。其五年往誠思勞。路遠濶音形。雖爲五載別。相與昧平生。捨車遵往路。鳧藻馳目成。南金豈不重。聊自意所輕。義心多苦調。密比金玉聲。其六高節難久淹。竭來空復辭。遲遲前途盡。依依造門基。上堂拜嘉慶。入室問何之。日暮行采歸。物色桑榆時。美人望昏至。慚歎前相持。其七有懷誰能已。聊用申苦難。離居殊年載。一別阻河關。春來無時豫。秋至恒早寒。明發動愁心。閨中起長歎。慘悽歲方晏。日落游子顏。

其八高張生絕絃聲急由調起自昔枉光塵結言固終始如  
何久爲別百行愆諸已君子失明義誰與偕沒齒愧彼行露  
詩甘之長川汜其九

五君詠五首

顏延之

阮步兵

阮公雖淪跡識密鑿亦洞沈醉似埋照寓辭類託諷長嘯若  
懷人越禮自驚衆物故不可論途窮能無慟

嵇中散

中散不偶世本自餐霞人形解驗默仙吐論知凝神立俗迂  
流議尋仙洽隱淪鸞翮有時鍛龍性誰能馴

劉參軍

劉伶善閉關懷情滅聞見鼓鐘不足歡榮色豈能眩韜精日  
沈飲誰知非荒宴頌酒雖短章深衷自此見

阮始平

仲容青雲器實稟生民秀達音何用深識微在金奏郭奕已  
心醉山公非虛覲屢薦不入官一麾乃出守

向常侍

向秀甘淡薄深心託毫素探道好淵玄觀書鄙章句交呂旣  
鴻軒攀嵇亦鳳舉流連河裏游惻愴山陽賦

詠史詩

鮑昭

五都矜財雄三川養聲利百金不市死明經有高位京城十  
二衢飛甍各鱗次仕子彫華纓遊客竦輕轡明星晨未稀軒

蓋已雲至賓御紛颯沓鞍馬光照地寒暑在一時繁華及春  
媚君平獨寂寞身世兩相棄

詠霍將軍北伐詩

虞子陽

擁旄爲漢將汗馬出長城長城地勢險萬里與雲平涼秋八  
九月虜騎入幽并飛狐白日晚瀚海愁雲生羽書時斷絕刁  
斗晝夜驚乘墉揮寶劍蔽日引高旂雲屯七萃士魚麗六郡  
兵胡笳關下思羌笛隴頭鳴骨都先自讐日逐次亡精玉門  
罷斥候甲第始修營位登萬庾積功立百行成天長地自久  
人道有虧盈未窮激楚樂已見高臺傾當令麟閣上千載有  
雄名

百一詩

應璩

下流不可處君子慎厥初名高不宿著易用受侵誣前者隳  
官去有人適我間田家無所有酌醴焚枯魚問我何功德三  
入承明廬所占於此土是謂仁智居文章不經國筐篋無尺  
書用等稱才學往往見歎譽避席跪自陳賤子實空虛宋人  
遇周客慚媿靡所如

遊仙詩

何劭

青青陵上松亭亭高山栢光色冬夏茂根柢無彫落吉士懷  
貞心悟物思遠託揚志玄雲際流日矚巖石羨昔王子喬友  
道發伊洛迢遞陵峻岳連翩御飛鶴抗跡遺萬里豈戀生人  
樂長懷慕仙類眩然心綿邈

遊仙詩七首

郭璞

京華遊俠窟。山林隱遯樓。朱門何足榮。未若託蓬萊。臨源挹  
清波。凌岡汲丹雘。靈谿可潛盤。安事登雲梯。漆園有傲吏。萊  
氏有逸妻。進則保龍見。退爲觸藩抵。高蹈風塵外。長揖謝夷  
齊。青谿千餘仞。中有一道士。雲生梁棟間。風出窻戶裏。借問  
此何誰。云是鬼谷子。翹迹企潁陽。臨河思洗耳。聞闔西南來。  
潛波渙鱗起。靈妃顧我笑。粲然啓玉齒。寒修時不存。夏之將  
誰使。翡翠戲蘭苕。容色更相鮮。綠蘿結高林。蒙籠蓋一山中。  
有冥寂士。靜嘯撫清絃。放情凌霄外。嚼藥挹飛泉。赤松臨上  
游。駕鴻乘紫煙。左挹浮丘袖。右拍洪崖肩。借問蜉蝣輩。寧知  
龜鶴年。六龍安可頓。運流有代謝。時變感人思。已秋復願夏。  
淮海變微禽。吾生獨不化。雖欲騰丹谿。雲螭非我駕。愧無魯

陽德。迴日向三舍。臨川哀年邁。撫心獨悲吒。逸翮思拂霄。迅  
足羨遠游。清源無增瀾。安得運吞舟。珪璋雖特達。明月難闇  
投。潛穎怨青陽。陵苕哀素秋。悲來惻丹心。零淚緣纓流。雜縣  
寓魯門。風煖將爲災。吞舟涌海底。高浪駕蓬萊。神仙排雲出。  
但見金銀臺。陵陽挹丹溜。容成揮玉林。姮娥揚妙音。洪崖頷  
其頤。升降隨長煙。飄飄戲九垓。奇齡邁五龍。千歲方嬰孩。燕  
昭無靈氣。漢武非仙才。晦朔如循環。月盈已復魄。蓂收清西  
陸。朱羲將由白。寒露拂陵苕。女蘿辭松柏。薜榮不終朝。蜉蝣  
豈見夕。圓丘有奇草。鍾山出靈液。王孫列八珍。安期鍊五石。  
長揖當途人。去來山林客。

招隱詩二首

左思

杖策招隱士。荒塗橫古今。巖穴無結構。丘中有鳴琴。白雲停  
陰岡。丹葩曜陽林。石泉漱瓊瑤。纖鱗或浮沉。非必絲與竹。山  
水有清音。何事待嘯歌。灌木自悲吟。秋菊兼糗糧。幽蘭間重  
襟。躊躇足力煩。聊欲投吾簪。經始東山廬。果下自成榛。前有  
寒泉井。聊可瑩心神。峭蒨蒨青蔥。間竹栢得其真。弱葉棲霜雪。  
飛榮流餘津。爵服無常玩。好惡有屈伸。結綬生纏牽。彈冠去  
埃塵。惠連非吾屈。首陽非吾仁。相與觀所尚。逍遙撰良辰。

招隱詩

陸機

明發心不夷。振衣聊躑躅。躑躅欲安之。幽人在浚谷。朝采南  
澗藻。夕息西山足。輕條象雲構。密葉成翠幄。激楚竹蘭林。回  
芳薄秀木。山溜何泠泠。飛泉漱鳴玉。哀音附靈波。頽響赴曾  
曲。至樂非有假。安事澆淳樸。富貴苟難圖。稅駕從所欲。

反招隱詩

王康琚

小隱隱陵藪。大隱隱朝市。伯夷竄首陽。老聃伏柱史。昔在太  
平時。亦有巢居子。今雖盛明世。能無中林士。放神青雲外。絕  
迹窮山裏。鷓鴣先晨鳴。哀風迎夜起。凝霜凋朱顏。寒泉傷玉  
趾。周才信衆人。偏智任諸已。推分得天和。矯性失至理。歸來  
安所期。與物齊終始。

芙蓉池作

魏文帝

乘輦夜行遊。逍遙步西園。雙渠相溉灌。嘉木繞通川。卑枝拂  
羽蓋。修條摩蒼天。驚風扶輪轂。飛鳥翔我前。丹霞夾明月。華  
星出雲間。上天垂光采。五色一何鮮。壽命非松喬。誰能得神

仙遊快心意保已終百年

南州桓公九井作

殷仲文

四運雖鱗次理化各有準獨有清秋日能使高興盡景氣多  
明遠風物自淒緊爽籟驚幽律哀壑叩虛牝歲寒無早秀浮  
榮甘夙隕何以標貞脆薄言寄松菌哲匠感蕭晨肅此塵外  
軫廣筵散泛愛逸爵紆勝引伊余樂好仁惑祛吝亦泯猥首  
阿衡朝將貽匈奴哂

游西池

謝混

悟彼蟋蟀唱信此勞者歌有來豈不疾良遊常蹉跎逍遙越  
城肆願言屢經過廻阡被陵闕高臺眺飛霞惠風蕩繁囿白  
雲屯曾阿景昊鳴禽集水木湛清華褰裳順蘭沚徙倚引芳

柯美人愆歲月遲暮獨如何無爲牽所思南榮戒其多

泛湖歸出樓中翫月

謝惠連

日落泛澄瀛星羅浮輕橈憩謝面曲汜臨流對廻潮輟策共  
駢筵並坐相招要哀鴻鳴沙渚悲猿響山椒亭亭映江月瀏  
瀏出谷飈斐斐氣幕岫泫泫露盈條近矚祛幽蘊遠視盪澗  
囂晤言不知罷從夕至清朝

從游京口北固應詔

謝靈運

玉璽戒誠信黃屋示崇高事爲名教用道以神理超昔聞汾  
水游今見塵外鑣鳴笳發春渚稅鑿登山椒張組眺倒景列  
筵矚歸潮遠巖映蘭薄白日麗江臯原隰萋綠柳墟囿散紅  
桃皇心美陽澤萬象咸光昭顧已枉維繫撫志慚場苗工拙



各所宜終以反林巢。曾是繁舊想。覽物奏長謠。

晚出西射堂

謝靈運

步出西城門。遙望城西岑。連障疊巘嶠。青翠杳深沈。曉霜楓葉丹。夕曛嵐氣陰。節往感不淺。感來念已深。羈雌戀舊侶。迷鳥懷故林。含情尚勞愛。如何離賞心。撫鏡華緇鬢。攬帶緩促衿。安排徒空言。幽獨賴鳴琴。

登池上樓

謝靈運

潛虬媚幽姿。飛鴻響遠音。薄霄愧雲浮。棲川怍淵沈。進德智所拙。退耕力不任。狗祿反窮海。臥疴對空林。衾枕昧節候。褰闌暫窺臨。傾耳聆波瀾。舉目眺嶇嶸。初景革緒風。新陽改故陰。池塘生春草。園柳變鳴禽。祁祁傷幽歌。萋萋感楚吟。索居易易。永久離群難。處心持操。豈獨古無悶。徵在今。

遊南亭

謝靈運

時竟夕澄霽。雲歸日西馳。密林含餘清。遠峯隱半規。久痾昏墊苦。旅館眺郊岐。澤蘭漸被徑。芙蓉始發池。未厭青春好。已覩朱明移。感感物歎。星星白髮垂。藥餌情所止。衰疾忽在斯。逝將候秋水。息景偃舊崖。我志誰與亮。賞心惟良知。

遊赤石進帆海

謝靈運

首夏猶清和。芳草亦未歇。水宿淹晨暮。陰霞屢興沒。周覽倦瀛壖。况乃凌窮髮。川后時安流。天吳靜不發。揚帆采石華。挂席拾海月。溟漲無端倪。虛舟有超越。仲連輕齊組。子牟眷魏闕。矜名道不足。適已物可忽。請附任公言。終然謝天伐。

石壁精舍還湖中作

謝靈運

昏日變氣候山水含清暉清暉能娛人游子憺忘歸出谷日  
尚早入舟陽已微林壑斂暝色雲霞收夕霏芰荷迭映蔚蒲  
稗相因依披拂趨南徑愉悅偃東扉慮澹物自輕意愜理無  
違寄言攝生客試用此道推

登石門最高頂

謝靈運

晨策尋絕壁夕息在山棲疏峯抗高館對嶺臨迴谿長林羅  
戶庭積石擁基階連巖覺路塞密竹使徑迷來人忘新術去  
子感故蹊活活夕流駛噉噉夜猿啼沈冥豈別理守道自不  
攜心契九秋榦日翫三春萋居常以待終處順故安排惜無  
同懷客共登青雲梯

於南山往北山經湖中瞻眺

謝靈運

朝旦發陽崖景落憩陰峯舍舟眺迴渚停策倚茂松側徑旣  
窈窕環洲亦玲瓏俛視喬木杪仰聆大壑淙石橫水分流林  
密蹊絕蹤解作竟何感生長皆手容初篁苞綠籜新蒲含紫  
茸海鷗戲春岸天雞弄和風撫化心無厭覽物眷彌重不惜  
去人遠但恨莫與同孤游非情歎賞廢理誰通

從斤竹澗越嶺溪行

謝靈運

猿鳴誠知曙谷幽光未顯巖下雲方合花上露猶泫透迤傍  
隈隩迢遞陟陁峴過澗旣厲急登棧亦凌緬川渚屢逕復乘  
流翫廻轉蘋萍泛沈深菰蒲冒清淺企石挹飛泉攀林摘葉  
卷想見山阿人薜蘿若在眼握蘭勤徒結折麻心莫展情用

賞為美事。昧竟誰辨。觀此遺物。慮一悟得所遣。

應詔觀北湖田收

顏延之

周御窮轍跡。夏載歷山川。蓄軫豈明憇。善游皆聖仙。帝暉膺  
順動。清蹕巡廣廡。樓觀眺豐穎。金駕映松山。飛奔互流綬。緹  
鼓代廻環。神行埒浮景。爭光溢中天。開冬春徂物。殘悴盈化  
先。陽陸團精氣。陰谷曳寒煙。攢素既森藹。積翠亦蔥芊。息饗  
報嘉歲。通急戒無年。溫渥浹典隸。和惠屬後筵。觀風久有作  
陳詩愧未妍。疲弱謝凌遽。取累非纏牽。

車駕幸京口侍游蒜山作

顏延之

元天高北列。日觀臨東溟。入河起陽峽。踐華因削成。巖險去  
漢宇。襟衛徙吳京。流池自化造。山關固神營。園縣極方望。邑  
社總地靈。宅道炳星緯。誕曜應辰明。睿思纏故里。巡駕而舊  
坳。陟峯騰輦路。尋雲抗瑤薨。春江壯風濤。蘭野茂萸英。宣游  
弘下濟。窮遠凝聖情。岳濱有和會。祥習在卜征。周南悲昔老  
留滯感遺萌。空食疲廊肆。反稅事巖耕。

車駕幸京口三月三日侍遊曲阿後湖作

顏延之

虞風載帝狩。夏諺頌王遊。春方動宸駕。望幸傾五州。山祗蹕  
嶠路。水若警滄流。神御出瑤軫。天儀降藻舟。萬軸胤行衛。千  
翼泛飛浮。彫雲麗璇蓋。祥飈被綵旒。江南進荆豔。河激獻趙  
謳。金練照海浦。笳鼓震溟洲。藐盼觀青崖。衍漾觀綠疇。民靈  
騫都野。鱗翰聳洲丘。德禮既普洽。川岳徧懷柔。

行樂至城東橋

鮑昭

雞鳴關吏起。伐鼓早通晨。嚴車臨廻陌。延瞰歷城闔。蔓草緣高隅。修楊夾廣津。迅風首且發。平路塞飛塵。擾擾遊宦子。營營市井人。懷金近從利。撫劍遠辭親。爭先萬里途。各事百年身。開芳及稚節。合彩吝驚春。尊賢永照灼。孤賤長隱淪。容華坐消歇。端為誰苦辛。

遊東田

謝朓

戚戚苦無悰。携手共行樂。尋雲陟累榭。隨山望菌閣。遠樹曖阡阡。生煙紛漠漠。魚戲新荷動。鳥散餘花落。不對芳春酒。還望青山郭。

從冠軍建平王登廬山香爐峯

江淹

廣成愛神鼎。淮南好丹經。此山具鸞鶴。往來盡仙靈。瑤草正翕絕。玉樹信蔥青。絳氣下紫薄。白雲上杳冥。中坐瞰蜿蜒。俯伏視流星。不尋遐怪極。則知耳目驚。日落長沙渚。曾陰萬里生。藉蘭素多意。臨風默含情。方學松柏隱。羞逐市井名。幸承光誦末。伏思託後旌。

鍾山詩應西陽王教

沈約

靈山紀地德。險峭資岳靈。終南表秦觀。少室邇王城。翠鳳翔淮海。衿帶繞神坳。北阜何其峻。林薄杳蔥青。其發地多奇。嶺于雲非一狀。合杳共隱天。參差互相望。鬱律構丹巘。峻嶒起青嶂。勢隨九疑高。氣與三山壯。其二卽事既多美。臨眺殊復奇。南瞻儲胥觀。西望昆明池。山中咸可悅。賞逐四時移。春

光發隴首秋風生桂枝其三多值息心侶結架山之足八解  
鳴澗流四禪隱巖曲窈冥終不見蕭條無可欲所願從之遊  
寸心於此足其四君王挺逸趣羽旆臨崇基白雲隨玉趾青  
霞雜桂旗淹留訪五藥顧步佇三芝於焉仰鑣駕歲暮以爲  
期其五

宿東園

沈約

陳王關雞道安仁采樵路東郊豈異昔聊可閑余步野徑既  
盤紆荒阡亦交互權籬疎復密荆扉新且故樹頂鳴風颺草  
根積霜露驚麝去不息征鳥時相顧茅棟嘯愁鷗平岡走寒  
兔夕陰帶會阜長煙引輕素飛光忽我適豈止歲云暮若蒙  
西山藥顏齡儻能度

游沈道士館

沈約

秦皇御宇宙漢帝恢武功懽娛人事盡情性猶未充銳意三  
山上託慕九霄中既表祈年觀復立望仙宮寧爲心好道直  
由意無窮日余知止足是願不須豐遇可淹留處便欲息微  
躬山嶂遠重疊竹樹近蒙籠開衿濯寒水解帶臨清風所累  
非外物爲念在玄空朋來握石髓賓至駕輕鴻都令人徑絕  
唯使雲路通一舉凌倒景無事適華嵩寄言賞心客歲暮爾  
來同

古意酬到長史溉登琅邪城

徐悱

甘泉警烽候上谷抵樓蘭此江稱豁險茲山復鬱盤表裏窮  
形勝襟帶盡巖巒修篁壯下屬危樓峻上干登陣起遐望廻

首見長安金溝朝灞。涯角道入鴛鴦。鮮車駑華。鞞汗馬。躍銀  
鞍。少年負壯氣。耿介立衝冠。懷紀燕山石。思開函谷丸。豈如  
霸上戲。羞取路傍觀。寄言封侯者。數奇良可歎。

詠懷詩十七首

阮籍

夜中不能寐。起坐彈鳴琴。薄帷鑒明月。清風吹我襟。孤鴻號  
外野。翔鳥鳴北林。徘徊將何見。憂思獨傷心。  
二妃遊江濱。逍遙順風翔。交甫懷環珮。婉孌有芬芳。倚靡情歡  
愛。千載不相忘。傾城迷下蔡。容好結中腸。感激生憂思。萱草  
樹蘭房。膏沐爲誰施。其雨怨朝陽。如何金石交。一旦更離傷。  
嘉樹下成蹊。東園桃李與李。秋風吹飛藿。零落從此始。繁華有  
憔悴。堂上生荆杞。驅馬舍之去。去去西山趾。一身不自保。何

况戀妻子。凝霜被野草。歲暮亦云已。

昔日繁華子。安陵與龍陽。夭夭桃李花。灼灼有輝光。悅懌若  
九春。馨折似秋霜。流盼發姿媚。言笑吐芬芳。携手等歡愛。宿  
昔同衣裳。願爲雙飛鳥。比翼共翱翔。丹青著明誓。永世不相  
忘。

天馬出西北。由來從東道。春秋非有託。富貴焉常保。清露被  
臯蘭。凝霜霑野草。朝爲媚少年。夕暮成醜老。自非王子晉。誰  
能常美好。

登高臨四野。北望青山阿。松栢翳岡岑。飛鳥鳴相過。感慨懷  
辛酸。怨毒常苦多。季公悲東門。蘇子狹三河。求仁自得仁。豈  
復歎咨嗟。

文選正文卷之五  
開秋北涼氣。蟋蟀鳴床帷。感物懷殷憂。悄悄令心悲。多言焉  
所告。繁辭將訴誰。微風吹羅袂。明月耀清暉。晨雞鳴高樹。命  
駕起旋歸。

平生少年時。輕薄好絃歌。西游咸陽中。趙李相經過。娛樂未  
終極。白日忽蹉跎。驅馬復來歸。反顧望三河。黃金百鎰盡。資  
用常苦多。北臨太行道。失路將如何。

昔聞東陵瓜。近在青門外。連畛距阡陌。子母相鉤帶。五色曜  
朝日。嘉賓四面會。膏火自煎熬。多財爲患害。布衣可終身。寵  
祿豈足賴。

步出上東門。北望首陽岑。下有采薇士。上有嘉樹林。良辰在  
何許。凝霜霑衣襟。寒風振山岡。玄雲起重陰。鳴鴈飛南征。鷓  
鴒發哀音。素質由商聲。悽愴傷我心。

昔年十四五。志尚好書詩。被褐懷珠玉。顏闕相與期。開軒臨  
四野。登高有所思。丘墓蔽山岡。萬代同一時。千秋萬歲後。榮  
名安所之。乃悟羨門子。嗷嗷今自嗤。

徘徊蓬池上。還顧望大梁。綠水揚洪波。曠野莽茫茫。走獸交  
橫馳。飛鳥相隨翔。是時鶉火中。日月正相望。朔風厲嚴寒。陰  
氣下微霜。羈旅無疇匹。俛仰懷哀傷。小人計其功。君子道其  
常。豈惜終憔悴。詠言著斯章。炎暑惟茲夏。三旬將欲移。芳樹  
垂綠葉。清雲自逶迤。四時更代謝。日月遞差馳。徘徊空堂上。  
惻怛莫我知。願覩卒歡好。不見悲別離。

灼灼西頽日。餘光照我衣。迴風吹四壁。寒鳥相因依。周周尚

銜羽蛩蛩亦念飢如何當路子磬折志所歸豈爲夸譽名憔悴使心悲寧與鷺雀翔不隨黃鵠飛黃鵠游四海中路將安歸

獨坐空堂上誰可與歡者出門臨永路不見行車馬登高望九州悠悠分曠野孤鳥西北飛離獸東南下日暮思親友晤言用自寫

北里多奇舞濮上有微音輕薄閑游子俯仰乍浮沉捷徑從狹路僂倂趣荒淫焉見王子喬乘雲翔鄧林獨有延年術可以慰我心

湛湛長江水上有楓樹林臯蘭被徑路青驪逝駸駸遠望令人悲春氣感我心三楚多秀士朝雲進荒淫朱華振芬芳高

蔡相追尋一爲黃雀哀涕下誰能禁

秋懷詩

謝惠連

平生無志意少小嬰憂患如何乘苦心矧復值秋晏皎皎天月明奕奕河宿爛蕭瑟含風蟬寥唳度雲鴈寒商動清閨孤燈暖幽幔耿介繁慮積展轉長宵半夷險難預謀倚伏昧前算雖好相如達不同長卿慢頗悅鄭生偃無取白衣宦未知古人心且從性所翫賓至可命觴朋來當染翰高臺驟登踐清波時陵亂頽魄不再圓傾義無兩日金石終銷毀丹青豔彫煥各勉玄髮歡無貽白首歎因歌遂成賦聊用布親串

臨終詩

歐陽建

伯陽適西戎孔子欲居蠻苟懷四方志所在可游盤况乃遭



屯蹇顛沛遇災患。古人達機兆。策馬遊近關。咨余沖且暗。抱責守微官。潛圖密已構。成此禍福端。恢恢六合間。四海一何寬。天網布絃網。投足不獲安。松栢隆冬瘁。然後知歲寒。不涉太行險。誰知斯路難。真偽因事顯。人情難豫觀。窮達有定分。慷慨復何歎。上負慈母恩。痛酷摧心肝。下顧所憐女。惻惻心中酸。一子棄若遺。念皆邁凶殘。不惜一身死。惟此如循環。執紙九情塞。揮筆涕洟瀾。

幽憤詩 四言

嵇康

嗟余薄祜。少遭不造。哀笄靡識。越在襁褓。母兄鞠育。有慈無威。恃愛肆姐。不訓不師。爰及冠帶。憑寵自放。抗心希古。任其所尚。託好老莊。賤物貴身。志在守樸。養素全真。日余不敏。好

善聞人。子玉之敗。屢增惟塵。大人含弘。藏垢懷恥。民之多僻。政不由己。惟此褊心。顯明藏否。感悟思愆。怛若創痛。欲寡其過。謗議沸騰。性不傷物。頻致怨憎。昔慚柳惠。今愧孫登。內負宿心。外慙良朋。仰慕嚴鄭。樂道閒居。與世無營。神氣晏如。咨予不淑。嬰累多虞。匪降自天。寔由頑疎。理蔽患結。卒致囹圄。對答鄙訕。繫此幽阻。實恥訟寃。時不我與。雖曰義直。神辱志沮。澡身滄浪。豈云能補。嗚嗚鳴鴈。奮翼北游。順時而動。得意忘憂。嗟我憤歎。曾莫能儔。事與願違。遣茲淹留。窮達有命。亦又何求。古人有言。善莫近名。奉時恭默。咎悔不生。萬石周慎。安親保榮。世務紛紜。祗攬予情。安樂必誠。乃終利貞。煌煌靈芝。一年三秀。子獨何為。有志不就。懲難思復。心焉內疚。庶勗

將來無馨無臭，禾被山阿，散髮巖岫，永嘯長吟，願性養壽。

七哀詩 五言

曹植

明月照高樓，流光正徘徊。上有愁思婦，悲歎有餘哀。借問歎者誰，言是宓子妻。君行踰十年，孤妾常獨棲。君若清路塵，妾若濁水泥。浮沉各異勢，會合何時諧。願為西南風，長逝入君懷。君懷良不開，賤妾當何依。

七哀詩 二首

王粲

西京亂無象，豺虎方遘患。復棄中國去，遠身適荆蠻。親戚對我悲，朋友相追攀。出門無所見，白骨蔽平原。路有飢婦人，抱子棄草間。顧聞號泣聲，揮涕獨不還。未知身死處，何能兩相完。驅馬棄之去，不忍聽此言。南登霸陵岸，回首望長安。悟彼

下泉人喟然傷心肝

荆蠻非我鄉，何為久滯淫。方舟溯大江，日暮愁我心。山岡有餘暎，巖阿增重陰。狐狸馳赴穴，飛鳥翔故林。流波激清響，猿猴臨岸吟。迅風拂裳袂，白露霑衣襟。獨夜不能寐，攝衣起撫琴。絲桐感人情，為我發悲音。羈旅無終極，憂思壯難任。

七哀詩 二首

張載

北芒何壘壘，高陵有四五。借問誰家墳，皆云漢世主。恭文遙相望，原陵鬱膺膺。季世喪亂起，賊盜如豺虎。毀壤過一抔，便房啓幽戶。珠柩離玉體，珍寶見剽虜。園寢化為墟，周墉無遺堵。蒙籠荆棘生，蹊徑登童豎。狐兔窟其中，燕穢不復掃。頽壘金墜發，萌筵營農圃。昔為萬乘君，今為丘山土。感彼雍門言。

悽愴哀往古

秋風吐商氣蕭瑟掃前林陽鳥收和響寒蟬無餘音白露中  
夜結木落柯條森朱光馳北陸浮景忽西沉顧望無所見唯  
觀松栢陰肅肅高桐枝翩翩棲孤禽仰聽離鴻鳴俯聞蜻蛚  
吟哀人易感傷觸物增悲心丘隴且已遠纏絲彌思深憂來  
令髮白誰云愁可任徘徊向長風淚下霑衣襟

悼亡詩三首

潘岳

荏苒冬春謝寒暑忽流易之子歸窮泉重壤永幽隔私懷誰  
克從淹留亦何益僮俛恭朝命廻心反初役望廬思其人入  
室想所歷幃屏無髣髴翰墨有餘跡流芳未及歇遺挂猶在  
壁悵恍如或存周惶忡驚惕如彼翰林鳥雙棲一朝隻如彼

游川魚比日中路析春風緣隙來晨雷承簷滴寢息何時忘  
沉憂日盈積庶幾有時哀莊缶猶可擊

皎皎窓中月照我室南端清商應秋至溽暑隨節闌凜凜涼  
風升始覺夏衾單豈曰無重纊誰與同歲寒歲寒無與同朗  
月何朧朧展轉盼枕席長簾竟牀空牀空委清塵室虛來悲  
風獨無李氏靈髣髴觀爾容撫襟長歎息不覺涕霑曾霑曾  
安能已悲懷從中起寢興日存形遺音猶在耳上慚東門吳  
下愧蒙莊子賦詩欲言志此志難具紀命也可奈何長戚自  
令鄙

驩靈運天機四節代遷逝淒淒朝露凝烈烈夕風厲奈何悼  
淑儷儀容永潛翳念此如昨日誰知已卒歲改服從朝政哀

心寄私制茵幃張故房朔望臨爾祭爾祭詎幾時朔望忽復  
盡衾裳一毀撤千載不復引疊疊朞月周戚戚彌相愍悲懷  
感物來泣滄應情隕駕言陟東阜望墳思紆軫徘徊墟墓間  
欲去復不忍徘徊不忍去徙倚步踟躕落葉委埏側枯荻帶  
墳隅孤魂獨煢煢安知靈輿無投心遵朝命揮滄強就車誰  
謂帝宮遠路極悲有餘

廬陵王墓下作

謝靈運

曉月發雲陽落日次朱方含悽泛廣川灑淚眺連岡眷言懷  
君子沉痛結中腸道消結憤懣運開申悲涼神期恒若存德  
音初不忘徂謝易永久松柏森已行延州協心許楚老惜蘭  
芳解劍竟何及撫墳徒自傷平生疑若人通蔽互相妨理感  
深情慟定非識所將脆促良可哀天枉特兼常一隨往化滅  
安用空名揚舉聲泣已灑長歎不成章

拜陵廟作

顏延之

周德恭明祀漢道遵光靈哀敬隆祖廟崇樹加園塋逮事休  
命始投迹階王庭陪厠廻天顧朝讌流聖情早服身義重晚  
達生戒輕否來王澤竭泰往人悔形勅躬慚積素復與昌運  
并恩合非漸漬榮會在逢迎風御嚴清制朝駕守禁城束紳  
入西寢伏軾出東坰衣冠終冥漠陵邑轉蔥青松風遵路急  
山煙冒壠生皇心憑容物民思被歌聲萬紀載絃吹千載託  
旒旌未殊帝世遠已同淪化胡幼壯困孤介未暮謝幽貞發  
軌喪夷易歸軫慎崎傾

同謝諮議銅爵臺詩

謝朓

總帷飄井幹。樽酒若平生。鬱鬱西陵樹。詎聞歌吹聲。芳襟染淚迹。嬋媛空復情。玉座猶寂寞。况乃妾身輕。

出郡傳舍哭范僕射

任昉

平生禮數絕。式瞻在國楨。一朝萬化盡。猶我故人情。待時屬興運。王佐俟民英。結歡三十載。生死一交情。携手道衰孽。接景事休明。運阻衡言革。時泰玉階平。濬冲得茂彥。夫子值在生。伊人有涇渭。非余揚濁清。將乖不忍別。欲以遣離情。不忍一辰意。千齡萬根生。其一 已矣平生事。詠歌盈篋笥。兼復相嘲謔。常與虛舟值。何時見范侯。還叙平生意。其二 與子別幾辰。經塗不盈旬。弗覩朱顏改。徒想平生人。寧知安歌日。非君

撒瑟晨已矣余何歎輟春哀國均其三





